

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

13 Septembre 2019

13 Muharram 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : **AL-HUJURAT : GHIBBAT (PARTIE 1)**

يَا أَيُّهَا الَّذِينَ ءَامَنُوا اجْتَنِبُوا كَثِيرًا مِّنَ الظَّنِّ إِنَّ بَعْضَ الظَّنِّ إِثْمٌ وَلَا تَجَسَّسُوا وَلَا يَغْتَبَ بَعْضُكُم بَعْضًا أَيُحِبُّ أَحَدُكُمْ أَن يَأْكُلَ لَحْمَ أَخِيهِ مَيْتًا فَكَرِهْتُمُوهُ
وَأَنقُوا اللَّهَ إِنَّ اللَّهَ تَوَّابٌ رَّحِيمٌ

Yaaa-'ayyuhallaziina 'aamanuj-tanibuu kasiiram-minaz-zann: 'inna ba' daz-zanni 'ismuww-wa laa tajassasuu wa laa yaghtab - ba'-dukum ba'-daa. 'Ayuhibbu 'ahadukum 'ayy-ya'-kula lahma 'akhihi maytan-fakarihtumuuh? Wattaqul-laah: 'innallaaha Tawwaabur-Rahiim.

Ô ou ki fine gagne la foi (Imaan) ! Évite fer trop beaucoup suppositions parski parmi là-dans ena ki péchés. Et pas espionner, et pas diffamer entre zot-mêmes. Eski ene d'entre zot ti pou content mange la chair de zot frère ki fine mort ? (Non!) zot ti pou détester sa. Alor, craindre Allah, parski Allah Li accepter beaucoup répentir de bane dimounes, et Li Très Miséricordieux. (Al-Hujurat 49: 13)

Mo fine choisir pour cause encore ene fois lor sujet de « *Ghibbat* » ; même dans le passé mo ti faire ene série Khutba Jummah lor « *Ghibbat* » et lor chapitre *Al-Hujurat*.

C'est encore ene l'autre explication ki mo pé mette devant zot, parski sa Surah là li très important kot Allah (swt) pé mette en garde la société de bane *Momin* contre le « *Ghibbat* ». Couma zot conner ki « *Ghibbat* » veut dire « *Backbiting* » (Médiance), cause ene dimoune, contraye li derrière so lédos. Et Allah fine mette en garde contre sa dans bane tel mot si sévère, ki si ene dimoune bien comprend sa, bé jamais li pour approche le « *Ghibbat* ». Mais façon ki fine explique sa, montrer kifer bane dimounes ena l'attirance pour ene zaffaire si détestable comme le « *Ghibbat* ».

Sa zaffaire ki appelle « *Ghibbat* » là attire ou vers li et ou pas capave faire nannié. Kan ou lire sa chapitre *Al-Hujurat* là ou effrayer kan ou alle en profondeur de sa chapitre là ; et lerlà mo réfléchi beaucoup lor là, couma le Jamaat Ahmadiyya avec zot ex-so-called Amir Amine Jowaheer et so Managing Committee à l'époque ki kalité jalousie, doute, soupçon zot ti ena, ki fine développe ene tel la haine pour moi et kot sa la haine là fine filer et lerlà même kot sa le cœur là fine vine noir et réfléchir lor zot visage. Et avec zot langage ki zot fine servi contre moi, bane actions et sanctions et façons ki li, sa ex-so-called Amir là fine envoie so rapport en l'an 2000 au regretté 4^{ème} Calife du Mouvement Ahmadiyya et le Calife sans li écoute mo version, li prend ene sanction et en plus li fine envoie *Lannat* (malédiction) lor nous et avec plusieurs bane mots bien détestable et sévère, li fine agir sans *Taqwa*.

Alor tous sa là, à la base c'est à cause fine cite certains révélations ki mo fine recevoir. Li fine envoie ene tel *Lannat* lor moi comme-ci dirai li fine faire *Mubahila* avec moi. Et de l'autre côté sa ex-called Amir là, li fine prend li-même couma ene grand héros et Khutba Jummah lor Khutba Jummah li fine faire, kot li fine mange nous la chair avec l'appétit ; tellement de « *Ghibbat* » tous les vendredis dans bane Khutba Jummah commencer 2001, aller même, aparte bane réunion dans bane branches, programmes Massih Maoud Day, Mousleh Maoud Day, Khilafat Day, tous sa « Day » là ti vine Munir Azim Day et en plisse de sa, dans bane Ijtema, ki li pour Khuddam, Ansar et Jalsa Salana, pas ti ena kit programmes dans Jamaat Ahmadiyya à Maurice kot pas ti pé cause lor Munir Azim so « so-called revelation ». Sa même ti topic pli important ki zot ti ena, ki Munir Azim

rébel, etc. Et sa so-called ex-Amir là fine arrive ziska ene point jusqu'à li et so bane Mullahs fine dire ki *Khilafat* en danger. Zot ti créer tellement de la haine dans le cœur de bane Ahmadis (zommes, femmes et même zenfants) ziska zot ti traverse tous bane limites dans la religion. Zot tous ti dire ki « *Khilafat Nous La Vie* ». Zot pou saute licou de bane ki fine faire rebelle contre le Khalifa. Et sa ex-so-called Amir là fine gagne bane grand félicitation avec bane membres du Jamaat.

Donc, avec so bane palabres ki li fine faire et l'autre, ene Khalifa fine croire dans so bane palabres sans écoute moi, guette kot le Jamaat Ahmadiyya fine aller, fine alle à la dérive. *Noor-e-Ilaahi* (Allah So *Noor*) fine disparaite dans ene Jamaat Massih Maoud (as) ; bizin dire ki plisse ki 90% Ahmadis ti fine ena sa la haine là contre nous, et sa la haine là fine faire zot les cœurs vine noirs et zot l'attitude envers nous fine vine pli mauvais et vilain, et sa noirté dans le cœur là reflecter lor zot, couma dire zot lor ene roche noir dans marée noire.

Donc, guette situation Jamaat Ahmadiyya national et international, zot népli ena bane l'enseignements islamique, ni même l'enseignement Hazrat Massih Maoud (as). Zot fine faire Khalifa vine zot idole et piétine l'enseignement divine. Séki rester seulement c'est « *Ghibbat* » et la haine. Par contre bane dimounes ki ena *Taqwa*, la crainte d'Allah dans zot les cœurs, ena ene ferme croyance dans zot les cœurs lor l'unicité d'Allah, zot sorti dans sa cercle idole Khalifa, la haine, « *Ghibbat* », jalousie là etc. Zot plito quitte sa Jamaat dynastie, family-feeling là, kot tous les temps ena même figure à la tête et même causer ena, ki bizin mette boycott, créer la haine, faire palabres et soupçonne nous. Alor bane *Muttaqi* trouver ki sa c'est pas bane l'enseignements divines. Zot sorti de là pour pas tombe dans sa piège de bane péchés là.

Donc, kan ou lire Surah Al-Hujurat, kot Allah (swt) dire : Ô bane dimounes ki fine amène *Imaan* (*Imaan* lor ki sanlà ?) – *Imaan* lor Allah, Allah So bane commandements, Allah So bane l'instructions – Allah dire ou, éviter gagne bane soupçons, bane doutes. Et beaucoup de bane soupçons ki tel tel zaffaire fine capave coumsa, li tellement ene mauvais l'habitude ki certains là-dans vine bane péchés.

Ena bane dimounes ki ena sa l'habitude de soupçonner là ki bien dangereux. Zot pose toutes sortes kalités questions pour conne zaffaires zot camarades couma nous dire de « A à Z » ; tous zaffaires zot rode conner, zot rentre dans tous détails,

même alle dans la vie privée d'ene dimoune, ki bien grave et pour zot, zot zaffaires ditout ou pas pour conner.

Donc, bane dimounes ki content espionner coumsa, lirlà même zot saryé séki zot fine espionner, faire sa vine ene longueur et alle cause sa avec l'autre et sa vine ene « *Ghibbat* » (palabre) kot sa développe la haine, la guerre, dispute et finalement ou fine commette ene péché bien grave et sa bane dimounes ki espionner là, en fait soupçonner ena profond lien avec espionner. Sa bane dimounes là bien dangereux.

De l'autre côté, ene dimoune fine prend ene bain et mette so linge bien propre lor li, li pou reste bien loin avec bane malpropreté, avec la poussière, avec bane zaffaires ki sale, li pas pour rode salir li. Li fine conne valeur pour garde li propre. Donc, coumsa même pour garde ou *Imaan* propre, bizin reste loin avec soupçonner, espionner, « *Ghibbat* ». Sa sujet là contigner kot Allah (swt) dire, pas contraye personne, c'est-à-dire, faudré pas ou cause contre quelqu'un dans so l'absence. Sa aussi ena kot ene dimoune ena l'habitude de douter ; très vite li tombe à la conclusion ki tel tel zaffaire fine capave arriver. Et celui ki ena l'habitude espionner, bé sa dimoune là, dans so bane doutes et so soupçons li arrive bien près avec le péché, ki bien grave. Sa même Allah (swt) fine mette nous en garde dans Surah Al-Hujurat, Chapitre 49 contre sa bane mals, couma « **Tajassus** ».

« **Tajassus** », veut dire ki li [sa dimoune là] content cherche défauts les autres. Li envie conne défauts so camarade. Li ena ene l'objectif bien défini kan li pé rode conne tous sa là. Bane dimounes coumsa zot ena ene la haine ki ti cachiette pour zot frère ou sœur et lor là, zot espionner pour conne défaut de celui ki zot pas content et l'heure là même zot faire « *Ghibbat* » (palabres) kot sa fini mal. Zamais ou pas pou trouver ki ene maman et papa assizer pour faire « *Ghibbat* » de zot bane zenfants. Ou sois bane zenfants pé contraye zot bane parents [ena bane exception bien sûr – mais là, mo pé cause généralement parlant]. Mais si effectivement zot faire sa, bé li veut dire ki dans zot bane relations ena de tel manquements ki nous appelle la folie. Mais pour faire « *Ghibbat* » lor quelqu'un c'est ki faudré ou pas content li ou soi ena quique jalousie contre li. C'est sa bane zaffaires là ki faire ou contraye li. Et là-dans premièrement ou espionne li, et ensuite kan ou douter, ou espionnage prend ene forme ki pas nécessairement vrai. C'est ou doute et ou espionnage ki faire ou tire bane conclusions.

Ou calculer ki ou fine arrive depuis là et ou fine trouve tel zaffaires mais ou commence propage séki ou pas fine trouver. Séki ou douter et espionner, puisque sa voyage là ti commencer même lor mauvais l'intention, alor n'importe ki conclusion ki ou tirer kan même ou certain lor là ou pas, ou necque commence propage sa pli devant et ou prend plaisir là-dans.

Sa c'est tout ene voyage psychologique ki celui ki faire « *Ghibbat* » adopter et ki Quran fine mentionner étape par étape, exactement couma li été dans la nature humaine. Mais sa c'est pas la seule raison de cause ene dimoune derrière so les dos. Li pas veut dire ki à part sa bane zaffaires là péna aucaine « *Ghibbat* », Non. Sans soupçon aussi ena « *Ghibbat* ». Par exemple, si ouvertement ou conne ene dimoune so bane défauts, c'est-à-dire, ki ou pas fine faire aucaine espionnage pour alle conne so bane faiblesses, et kan ou guette so bane faiblesses là avec la haine et au lieu ki ou essaye éloigne so faiblesse, ou alle propage sa partout à bane dimounes de sorte ki bane dimounes créer ene distance avec dimoune ki ou fine contrayer là. Couma dire, à travers ou causer contre dimoune là so bane mauvais ou créer bane l'ennementé contre li et ou attane ki bane dimounes side are ou. Avec sa kalité l'intention là aussi bane dimounes faire le « *Ghibbat* » lor bane zaffaires ki bazé lor la vérité, mais c'est kan l'intention traver, lerlà li vine ene péché. Sinon li pas ene péché.

Ene fois, Hazrat Muhammad (saws) en présence d'ene so madame pieuse ti pé mentionne quelque chose lor ene kikaine. Madame là fine penser : bé là eski ou pas pé faire « *Ghibbat* » là ? Du fait ki dimoune là pas présent. Mais bane dimounes ki ena ene grand statut, ene grand rang, kan zot mentionne quelque chose lor quelqu'un devant ene lotte dimoune, zot conner couma pour faire li sans créer l'ennementé, la haine. Zot faire li dans ene façon pour ki bane ki tender aussi pas développe la haine, ni douter. Li faire li dans ene tel façon kot faire l'éducation dans bane les zot avec bane bon conseils pour pas tombe dans le piège de « *Ghibbat* », ni créer désordre ou dispute avec sa.

Au contraire, à travers sa bane l'exemples et donne conseils là, li terminer par ene la paix, tranquillité et l'amour pour les autres et zamais Hazrat Muhammad (saws) fine faire « *Ghibbat* », pas ti ena aucaine mauvais l'intention derrière sa et de côté Allah aussi, li pas compter comme « *Ghibbat* ». Et Nabi Kareem Muhammad (saws) zamais pas fine faire « *Ghibbat* ».

Donc, pour azordi mo pour arrête là-même et *Insha-Allah*, le Khutba Jummah lor sa sujet là pour contigner. Li ene sujet bien vaste et important pour l'éducation de tous nous bane membres du Jamaat Ul Sahih Al Islam et pour le *Ummah* de Hazrat Muhammad (saws) en général.

Ki Allah protège nous contre tous sa bane mals là. *Ameen*. Ki Allah préserve nous dans la droiture, avec *Taqwa*, et nous pas approche de près ni avec « *Ghibat* » ou « *Tajassus* », ni avec bane les autres mals ki fine mentionner dans sa verset, et dans tout le Surah Al-Hujurat et dans Quran en entier. *Insha-Allah, Ameen*.